

淳化縣志

利

陕西省图书馆藏书	
书号	D631 107·5
登记号	原12405·

00763

淳化縣志

元 康熙四十二年

知縣張如錦重



淳化縣志卷之五

知縣事長洲張如錦重纂

選舉志

科第

貢士

武榜

賜封

從來山川所萃鍾靈毓秀而人才出焉秦中固所稱神明之奧也歷代文經武緯彪炳傳記本縣雖雲陽支鎮而流峙今古不異通都大邑拔茅連茹宜不乏人

國家立賢無方特設科目以收羅英雋生逢隆盛誰
無觀光利見之思今考歷科鄉會選造及思歲明
經詳列於篇俾伏首揣摩知所矜式而干城之材
亦有以興起馳封世澤端必由此

本朝南宮之選正虛以埃試思鴈塔曲江流風未遠
能無望於濟濟多士乎地靈人傑引領以之

科第

進士 凡已見進士者鄉科不重錄

宋侯莫潛

王洲

李高

侯莫逸

董持

田克

葉賓

以上俱見儒學
八行八刑碑陰

明羅廷繡 嘉靖辛卯科舉人 戊戌科進士 詳見

人物

羅廷紳 嘉靖丙午科舉人 癸丑科進士 詳見人

物

羅奎 嘉靖甲子科舉人 隆慶戊辰科進士 詳見

人物

賈克忠 萬曆癸卯科舉人 甲辰科進士 詳見人

物

國朝

舉人

宋張財

張紳

金呂濱

惠敦書

李珽

邢贄

張執禮

江安

張從謙

以上俱見儒學
八行八刑碑陰

明張景芳 洪武時人詳見人物

任泰亨 洪武時人任光祿寺署丞

張志學 永樂時人任滄州判官

桑本 永樂時人任山西介休縣訓導

羅政 永樂乙酉科解元任山西絳州訓導

趙信 永樂時人詳見人物

米祿 永樂時人任山西晉府教授

淡淵 永樂時人

張瓚 永樂時人

關黃 正統丁未科詳見人物

羅楫 景泰庚午科詳見人物

王迺 天順己卯科

袁紹宗 弘治己酉科

王啟霄 字九重 弘治壬子科任山西聞喜縣知縣

補直隸靖江縣知縣

白素 字純美 正德己卯科

馬白顯 字以忠 嘉靖戊子科任直隸饒陽縣知縣

蕭行唐縣知縣

王尙友 嘉靖甲午科詳見人物

王永壽 字體仁 嘉靖癸卯科任山東臨邑縣知縣

袁禎 嘉靖己酉科詳見人物

葛舜臣 嘉靖壬子科任直隸栢鄉縣知縣以才

調永清縣知縣

李承薰 字子香 嘉靖戊午科任山西屯留縣教諭

陞直隸棗強縣知縣歷任四川重慶府通判

王建中 字民極 嘉靖辛酉科

王思恭 字肅叔 嘉靖辛酉科

羅廷傑 字公興 嘉靖辛酉科

郝應芳 字惟實 隆慶丁卯科任直隸河間府訓導

陸東光 縣知縣歷任山西潞安府同知

羅希益 字景虞 萬曆壬午科詳見人物

羅胄 字漢章 萬曆甲午科任四川宜賓縣知縣

河南西華縣知縣

羅弘誼 字西愚 萬曆癸卯科

賈我琪 崇禎壬午科詳見人物

以上俱見舊志
州志儒學題名

國朝王珏

字明王

順治丙戌科任河南密縣知縣

賈獻廷

字公輔

順治辛卯科授四川蒼溪縣知縣

羅璇袞

字九章

康熙己酉科任延安府府谷縣教

諭見任鳳翔府汧陽縣教諭

張燦垣

康熙壬子科經魁詳見人物

王開基

字肇岐

康熙壬子科任臨洮府狄道縣教

諭見任漢中府西鄉縣教諭所著古今文門人刊

刻行世當荒歲賑貸全活宗黨至今稱之

王璽

字帝珍

康熙壬子科任漢中府西鄉縣教諭

姚謙

字六吉

康熙癸酉科

姚啟文

字彩生

康熙癸酉科

貢士

明以前俱無考

明第五寧

洪武時人詳見人物

賈貫

永樂時人詳見人物

任泰

任山西汝溪縣知縣

舊志汝上縣與袁讓任縣丞疑誤今從邠

州志

武斌

歷任山東按察司僉事

李貫

成化時人任四川寶縣知縣

袁讓

成化時人詳見人物

舊志天順中今從邠州志

王都

成化時人任河南汲縣縣丞

朱璉

任直隸無錫縣縣丞

姚溫

任直隸舒城縣縣丞

仙得春

任直隸東光縣知縣

姚昇

任直隸曲周縣縣丞

李賁

任直隸易州判官

劉泰

任直隸通州判官

閔文

羅恕 弘治時人任直隸衡水縣知縣陞四川布政司理問致仕年九十四

劉祥 任直隸處州府知事

郭縉

嚴政

杜廣

王忠 任直隸山海衛經歷

關珊 貴子 任直隸宛平縣縣丞

關琦 貴子

武英 任四川保寧府知事

陳情 任直隸江都縣主簿

關瑞 貴子

張斐 任直隸清苑縣主簿

馬聰

楊威

姚文

羅九思 字一之 楫子 由三水縣學弘治中任山西夏縣

知縣卒於官民立遺愛碑

袁珠 讓子

李逢春 字元之 任直隸永平府經歷

李時 字以中 任山東兗州府教授

袁寧 字世安 由三水縣學正德中任都察院檢校

陞山西浮山縣知縣

苟英 字令德 正德中任四川溫江縣主簿

王毓 字萃華 嘉靖中任四川長壽縣主簿

于聰 字尙德 任湖廣襄陽王府奉祀

朱杲 字東陽 嘉靖中任山東高密縣主簿改四川

營山縣主簿

魏輔

字良弼

嘉靖中任山西黎城縣縣丞陞直隸

賚皇縣知縣

仙尙廉

字宗義

嘉靖中任山西平陸縣縣丞陞直

隸肅寧縣知縣

任鉉

字文用

嘉靖中任直隸濬縣縣丞

羅天爵

字良貴

嘉靖中任直隸灤州判官

羅尙錦

字在中

嘉靖中任直隸高郵州判官陞深

澤縣知縣調南召縣知縣

劉源 字本盛 任河南原武縣主簿陞直隸博野縣

縣丞

羅正夫 字孟修

王志敏 字天性 嘉靖中任直隸涿州訓導

王濟周 字惠民 任山東夏津縣主簿

李性 字復性

關邦鎮 字汝節 任山東鉅野縣縣丞註誤去官人

共惜之

劉鏜 字鳴遠 任河南永寧縣訓導陞南陽縣教諭

羅賢夫 字孟育 任直隸慶雲縣知縣調鎮江府教

授

羅仁夫 嘉靖時人詳見人物

郭獻忠 字汝顯

李朝陽 字鳴鳳

袁秉直 字希魚 任山東章丘縣縣丞

任光裕 字德彰 任遼東廣寧衛教授

羅朝 字以時

劉天祥 字子和 任直隸順義縣訓導

王恒 字伯占

王化 字以誠 任山東登州府訓導

姚元德 字繼舜 任山西沁州吏目

寇從臯 字希唐 任四川馬湖府經歷

關治教 字孟明 邦鎮子

寇盈 字子虛

羅鯤 字子魚 嘉靖辛酉科副榜

王昂 字伯俛 隆慶時恩貢

杜孟舒 字紀政

以上俱見舊志邠州志年分俱無考

羅雲鳳 字應瑞 萬曆時人

羅吉夫 字天祥 任山西太谷縣知縣

羅大縉 萬曆時人 詳見人物

羅蟾 字蒲川 任山東肥城縣主簿

羅元 字忍軒 廷繡子 任光祿寺丞 陞河南南陽府通判

羅允 任河南嵩縣訓導 陞湖廣鄖縣教諭

羅椿 字葵峯 善書通古文 任河南汝陽訓導 陞四

川黔江教諭

羅弘讚字紳子任直隸繁昌縣訓導陞保安縣教

諭

羅弘誥字勤軒博學善楷書任青縣訓導

以上俱見羅氏家譜年分俱無考

宋明道 天啟六年歲貢詳見人物

張坊 崇禎八年歲貢詳見人物

餘俱無考

國朝郭嶠 順治二年歲貢任河州訓導陞鄜州學

正又陞榆林衛教授

賈我理

克忠子

順治二年拔貢任江南常州府通

判

楊其道

順治四年歲貢

姚開先

順治五年拔貢詳見人物

王克誠

順治六年歲貢

馬諫德

順治八年歲貢

羅萬里

順治八年恩貢授河南睢州判官

任王綬

順治十年歲貢

宋振麟

順治十年拔貢詳見人物

王兆熊

順治十二年歲貢

羅延祚

順治十四年歲貢任鞏昌府文縣訓導

楊其德

順治十六年歲貢任慶陽府環縣訓導

秦國翰

順治十八年歲貢

潘祚昌

順治十八年恩貢

張鵬翼

康熙三年歲貢

賈我瑛

康熙九年歲貢任興安州平利縣訓導

羅嘉積

康熙十一年恩拔貢監

劉從聖

康熙十一年歲貢詳見人物

安仁 康熙十三年歲貢詳見人物

王新運 字無還 康熙十五年恩貢任鞏昌府西和

縣訓導年九十引年歸里

羅延祊 康熙十五年歲貢任高台衛守禦所訓

導

郝之奚 康熙十七年歲貢詳見人物

王御風 康熙十九年歲貢詳見人物

楊其文 字子素 康熙二十一年歲貢

賈文耀 康熙二十三年歲貢詳見人物

張九經

字子一

康熙二十四年拔貢

呂鼎周

字卜年

康熙二十五年歲貢

羅萬圖

字還貞

康熙二十七年歲貢

呂奮渭

字建勳

康熙二十九年歲貢

任聖任

字莘叟

康熙三十一年歲貢

張遠猷

字伯宏

康熙三十三年歲貢

劉大烈

字丕承

康熙三十五年歲貢家貧苦志勤

於訓課三十九年知縣張如錦捐俸具束脯見延

為義學師

白調元 字揚輝 康熙三十七年拔貢

葛松齡 字壽生 康熙三十七年歲貢

李紹遠 字久登 康熙三十九年歲貢

武榜 本朝前俱無考

進士

國朝

舉人

國朝賈我瑚 字禹謨 康熙戊午科

馳封

明羅文善 以子楫貴贈文林郎河南商水縣知縣妻李氏封孺人

羅志剛 以子恕貴贈文林郎直隸衡水縣知縣妻李氏贈孺人

羅仁夫 以子廷繡貴補封中憲大夫通政司右通政妻袁氏累封恭人

王紀 以子尙友貴贈奉政大夫戶部福建司郎中妻劉氏贈宜人

羅中夫 以子廷紳貴封承德郎戶部山西司主

澤州縣志 卷之五
事妻劉氏封安人

羅廷輝 以子奎貴贈中憲大夫兵部員外郎妻
姚氏封宜人

羅琚 以子希益貴贈中憲大夫湖廣鄖陽府知
府妻姚氏贈恭人

羅楫妻韓氏封孺人

羅恕妻楊氏贈孺人

羅廷繡妻姚氏累封恭人

王尚友妻李氏封宜人

羅廷紳妻呂氏贈安人 繼妻張氏封安人

羅奎妻任氏累封恭人

羅希益妻任氏累贈恭人 繼妻張氏封恭人

以上俱見舊志羅氏家譜

淳化縣志卷之五 終

淳化縣志 卷之五

和

其

淳化縣志卷之六

知縣事長洲張如錦重纂

人物志

德望

孝義

流寓

列女

志書之難莫難於人物馮恭定公修長安志猶稱
名世賢達與時俱往而深山窮谷靜養潛修未盡
搜錄夫以首邑昭昭耳目間公博聞多識而慎重
立言如此山城僻陋載記殘缺奚從物色而悉得

之今本舊志復廣加諏考先列德望尊典刑也次
述孝義重名教也其他寓公旅跡大都采自曩代
惟間氣所鍾在閨壺中而數罹兵燹久閱冰霜多
鑿鑿表見者苟非詳爲哀次千百年後誰知彈丸
一方足以維綱常勵風俗不第湮沒幽魂亦恐貽
譏末學是尤載筆之責也夫

德望

漢宣秉

字巨公

少修高節顯名三輔哀平時隱遯

深山寢疾不仕王莽先後召皆不應更始徵爲侍

中光武建武元年拜御史中丞特詔與司隸校尉
尚書合會同並專席而坐京師號三獨坐明年遷
司隸校尉務舉大綱簡畧苛細百僚敬之性儉約
嘗服布被蔬食瓦噐帝幸其府舍見而歎曰楚國
二龔不如雲陽宣巨公賜布帛幃帳什物四年拜
大司徒司直所得俸祿以收養親族其孤弱分與
田地自無儋石之儲六年卒於官帝愍惜之除子
彪爲郎今祀鄉賢

通志載秉涇陽人光武云雲陽宣巨公
是時雲陽未分縣也仍舊志首錄之

王隆 字文山 雲陽人西漢末避難河西爲竇融左

護軍光武建武中爲新汲令能文章所著詩賦銘

書凡若干篇 見舊志

鄭樸 字子真 褒中人西漢末見王氏漸爲亂階移

家隱雲陽谷口大司馬王鳳以禮聘不應躬耕巖

石之下名震京師時人名所居處泉爲鄭泉

第五倫 字伯魚 京兆人光武建武中舉孝廉拜會

稽太守遷蜀郡太守肅宗時擢司空奉職盡節言

事無所依違時人方之貢禹年八十餘卒詔賜秘

器衣帛

按第五氏本諸山徙長陵以次第為氏三水志云有賜田宅在三水因家焉故裔孫獨盛本縣當明初有貢生第五寧第五無二宗亦其裔也今雖無後嗣可據當時必有支派特錄得氏之始者以識所自餘不多列

宋王弘毅

字子遠

唐王珪裔也總角通詩書善屬

文元兵克汴避難習醫及歸元管勾太醫院事治

疾如神年四十即求退隱谷口之文川結廬溪上

壽七十五而終

見涇陽志

元趙弼

字元輔

父得賢豐州軍民總管以征蜀過

京兆雲陽因家焉弼年十一父卒會世祖平雲南
歸駐平涼母携往謁世祖憐而愛之視遇甚優後
官朝列大夫歷簽書樞密院事大德三年以平章
政事議陝西省事卒贈潞國公事母至孝爲大都
留守屏騶從惟家僮一二饋食平生珠帽錦衣非
燕內庭不服其簡抑如此 見涇陽志

明張景芳 洪武中舉人任浙江金華府同知有

善政舊祀鄉賢

見舊志

第五寧 洪武中貢生任交趾當道知縣遠人畏

服舊祀鄉賢 見舊志

趙信 永樂中舉人任刑科給事中剛直敢言舊

祀鄉賢 見舊志

賈貫 永樂中貢生任山西絳州同知清白有守

舊祀鄉賢 見舊志

關貴 字天爵 正統丁卯科舉人任直隸良鄉縣教

諭轉四川成都府教授陞梓桐縣知縣四川通志

載築城事績後補綿竹縣調巴縣保寧府志載循

良傳今祀鄉賢 見舊志

羅楫 字濟川 景泰庚午科舉人任河南商水縣知

縣巡撫王端毅公題薦令行禁止政妥民安通省

卓異第一陞直隸開州知州政蹟詳開州志今祀

鄉賢 見舊志

袁讓 天順中貢生任山東汶上縣知縣持守公

廉善於撫字當道交薦其賢載山東通志秩蒲當

遷民伏闕奏留復任後以疾歸皆遮道泣送今祀

鄉賢

舊志稱任縣丞恐佐貳無復任之例今從邠州志

羅九霄

字隱之

年十二隨父楫任開州能襄理善

政卻饋金嘉靖初遷學衆共推監督勤慎不苟以
恩例有司勸加冠帶屢舉鄉飲晚號福田翁復建
永安橋爲地方風水所重工費浩繁皆捐貲以給
時年已髦扶杖親率工作無倦容子仁夫賢夫俱
貢生任知縣又督諸孫學年九十餘見廷繡登進
士任文選廷紳舉於鄉舊志載耆德詳見馬理撰
隱德傳載舊邠州志

羅仁夫

字孟居

嘗讀書壽峯山下自號壽峯嘉靖

中選貢生子廷繡任吏部郎中考績當封不受及
任通政當封又不受就任山西樂平縣知縣以廷
繡巡撫四川取道省親乃致仕歸在任多實政士
民攀轅擁道及卒補封右通政朝廷遣官諭祭於
墓詳見喬世寧撰墓碑

羅廷繡

字公裳

嘉靖辛卯科舉人戊戌科進士由

行人歷任吏部郎中太常寺卿通政使仕至四川
巡撫都御史明邑中無甲第自公發祥遂躋顯仕
制詞稱其樸茂之質練達之才晚年家居劄修本

縣志纂述淹貫考論詳核當爲鄉先達文學之冠
惜狀志遍索不得其他著述亦俱失傳

王尙友

字子益

嘉靖甲午科舉人初任四川通江

縣知縣由知州歷陞戶部福建司郎中居鄉惠愛
及人於封贈原築堰蓄水爲近村灌溉之利鄉人
德之立王郎中祠

羅廷紳

字公書

嘉靖丙午科舉人癸丑科進士由

主事歷任至四川保寧府知府贊其兄廷繡成本
縣志留心碑石遺蹟不致泯沒士大夫博學好古

河作鼎志 卷之九
畧見一班所著有小山志不傳其狀志亦無考

袁禎 字伯祥 嘉靖己酉科舉人隆慶中撫按會題

薦舉孝廉授國子監學正陞戶部員外郎

羅奎 字文光 嘉靖甲子科舉人隆慶戊辰科進士

任河南上蔡縣知縣薦舉卓異後歷陞兵部郎中
從朝廷大閱賜金帛仕至山東萊州府知府詳見

袁禎撰墓誌

羅希益 字景虞 萬曆壬午科舉人初任直隸望江

縣知縣由戶部員外郎中陞湖廣鄖陽府知府仕

至雲南按察司副使監軍多功滇中有長城之望
卒於官得旨贈卹

賈克忠

字獻我

萬曆癸卯科舉人甲辰科進士初

任直隸繫縣知縣調繁休寧縣陞刑部主事審錄
四川以矜疑出死罪以下百六十餘人蜀人頌之
尋任直隸廬州府知府除強暴興學校善政著聞
歷山西布政司叅政陞按察司按察使素性謹厚
家居杜門課子不妄交遊教諸生多所造就鄉曲

敬服今祀鄉賢

見通志

宋明道 字景程 天啟六年貢生任西鄉縣訓導尋

改紫陽縣陞肅州衛教授性寬和溫厚而不輕言
笑爲諸生模範肅如也以年老引歸杜門發所藏
書教其子振麟遂爲名士嘗躬親墾畝云農以資
學雖老不可忽及崇禎末大饑荒家人同食糠覈
以粟分給宗黨人交賴之 見通志

王近泉 逸其名不傳生有竒氣博覽古今不屑
爲舉子業以理學有名關中三水文光祿太青嘗

從之遊推爲高隱 見通志

羅大縉

字思雲

以歲貢任湖廣鄖縣訓導陞竹山

縣知縣在任有軍功隨陞鄖陽府推官監軍六營
又陞本府清軍同知

國朝賈我琪

字元圖

克忠仲子明崇禎壬午科舉人

本朝順治十三年任直隸大名府通判修黃河金龍
口勤慎有功加陞廣西慶遠府知府行至襄陽慨
然曰奈何以父母之身輕投瘴癘之鄉哉遂請致
仕歸里

張坊

字南谷

明崇禎中歲貢生初任興平縣訓導

陞沂陽縣教諭又陞寧夏衛教授端方正直勤課
多士當道三次薦擢委署平涼府推官

本朝順治初年留任教授引年歸自號南谷老人煙
霞丘壑寧靜淡遠不入城市復十餘年縣令趙文
二公皆推重屢舉鄉飲卒年九十四

姚開先

字堯門

順治五年恩拔貢生初任山西汾

州府臨縣知縣後補四川鹽井衛經歷康熙十三
年吳逆變滇中賊黨入蜀逼投順不屈於會鹽營
自縊而死子謙被掠後冒險扶觀歸奉母王氏甚

志力學中癸酉科鄉試不幸早卒忠烈之後不得
食報識者痛之孫源濬庠生

公素爲邑中名士以微官臨難大節皎然所撰前
令文公請鬪浮糧碑記序述情事饒有古人風格
其平生著述以令嗣歿後
散佚不可復得深爲惋惜

宋振麟 字子禎 順治十二年恩拔貢生性狷介博

極群書尤究心理學部檄應受職以疾辭及當事
薦舉博學復堅辭不應所至郡邑諸有司先達爭
聘致爲經師康熙三年賈中丞延修通志與華陰
王山史朝邑李叔則諸君同任纂輯叔則題像贊

有文獻不足有宋存焉之句富平李天生又云其
貌古以蒼其神清以剛其操潔而行芳其中坦而
外方亦可見其爲人矣所著大學知止義說二程
語錄寶鑑及詩文甚夥學者宗之年近七十端坐
而逝私諡文介先生子鈇峯宣庠廩生

葛大才

字文涵

舊義門里人年十七喪母哀毀過

人事繼母孝謹爲諸生閉戶潛修教子孫諄諄天
理人欲之辨當明祚將終夢日月並隕及闖寇至
又夢城隍神告丁憂平生無妄語以語人人皆異

之年六十豫剋期聚親族笑語而逝里中李平者
死三日復甦述於陰司見其衣冠談笑如生前且
告以善惡果報歷歷不爽人於是更異之子毓秀
孫攀桂俱廩生

羅萬藻

字舍素

清賢公五世孫也食餼於庠善承

家學清操介節終身如一日與同邑姚堯門宋子
禎爲道義交討論性命之學又能誨迪後進多所
造就子禎子鈇嘗受業其子金復受業鈇有文譽
試嘗冠軍

寇弘化 字禹門 邑庠生性醇厚與人溫和可親晚

自號東臯處士生平好施予時值歲凶解衣推食
全活者甚衆諸名流贈言在易爲敦艮之確在詩
爲載陽之熙良非虛語

張燦垣 字帝彩 庠生諱鳳翼子也少聰敏年十七

兩冠童子科二十餼於庠三應秋闈不利父怒訶
之跪而對曰兒火候未到耳閉戶揣摩思慰義方
之訓康熙壬子科雲間葉忠節公典試以春秋首
舉第三人墨卷俱刻程行世平日篤志事親和睦

族黨所居近河村有公子扶蘇廟與同里修葺設鄉約所朔望宣講

上諭化導鄉人困於公車身後家徒壁立一子見從義學受業

劉從聖

字孔門

康熙十一年歲貢生讀書教子足

跡不履公門任慶陽府環縣訓導時兵燹後棲止城樓捐俸修葺文廟立

御製碑告老歸卒年八十九子大定庠生大烈貢生

安仁 歲貢生任鳳翔府扶風縣訓導捐俸重修

啟聖祠立碑櫺星門又修三班三馬廟

郝之奚 歲貢生任漢中府褒城縣訓導以身施

教爲士林模楷捐俸修馬道青橋二驛橋梁復於

鷄頭關施茶湯以提供商旅雖小惠出自薄俸人多

頌之立有碑記

王御風 字鄭圃

以歲貢任潼關衛訓導時康熙三

十一年值大荒歉捐俸以助祭典又貸粟賑恤災

黎越三載卒於官

孝義

金盧安撫 史失其名初金於仲山之巔下臨涇水處屯兵其上設安撫司主其事末年盧某爲安撫壬辰元兵收陝西與妻子同投涇水死時人哀而義之 見涇陽志

元李子敬

字恭甫

世雲陽人性孝友質謹善治生

致富宗族鄉黨賴以葬者三十喪婚者八十餘家有貸不能償者輒焚券總爲錢六萬若干緡里中失火比屋延燒近其居自熄人皆謂積德所致嘗於三原建書院割田百畝供釋奠廩餼行省以聞

朝廷旌其門曰義士至元六年奉元路縣尹同毅

為撰李君義行記 見三原志

明王尚賢 字貴德 邑廩生事父母盡孝父卒事母

劉極恭順有戲綵娛親之意與友朋無競言犯而

不校人稱為長者子思恭舉人 見舊志

郭慶元 字汝節 幼孤賴嫡母齊氏撫養童時事齊

能盡孝及長生母劉氏既他適迎歸亦善事無異

志嘉靖初年恩例冠帶舉鄉飲 見舊志

和孟陽 里民也嘉靖二十六年為本縣稅糧折

布輕則減少拋荒地多抱奏詣闕事下布政司查
問與高陵民白世萬等折辨爭論至折齒不悔後
得照舊辦納闔邑義之詳見舊田賦志

葛竹溪 邑庠生素善射崇禎十四年流寇滿天
星過縣恣剽掠竹溪不勝忿及賊至寺坡崖奮然
挽弓挾矢射殺十餘人矢盡弦絕力不能支遂被
害知縣趙之琴題其門曰文武全材

國朝賈文耀

字彬彬

祖克忠父我琪幼寄居省中明

崇禎十六年十月闖賊入潼關省城陷舉家竄散

文耀時年十八負母任氏肩鋒刃兼值雨雪徒步涉渭河歸縣未幾土賊郭君振破縣同父母匿高樓賊誘我琪下縛之文耀求以身代不許縛至石門山張果老崖復號泣求贖乃釋其父而囚之賊婪索無厭日拷撻綁營外欲殺五六次賊首劉文炳憐其孝得稍縱歷二載餘赤身跣足苦楚萬狀一夕潛逃歸幸父母俱無恙勉勵讀書

本朝順治初年爲庠生康熙二十二年歲貢父歷任至知府母封安人人皆以孝子備嘗艱險殆不易

得云

葛俊

字前山

少失怙恃養於外大母趙氏趙素封

欲以爲嗣堅辭之以祖父宗祧自重明季徭役煩
苦里多流亡經營賠累皆稱長者子崇明性篤孝
母病侍湯藥嘗糞料不起晝夜號泣值歲竒荒令

從遠方販糴賑濟族人可讓等鄰里馬三用等數
十家俱賴以全活督課諸孫得歲貢者一松齡食
餼者一檜齡年八十二而終崇明年五十餘父歿
哀毀釋服日過慟一仆竟卒詳見李教諭一鵬撰

孝義傳

王興

字兩槐

順治初年從兄平遭寇傷身故遺嫂

郭氏及三孤窮苦不能自給迎歸奉養家本貧解衣分食遭歲饑荒夫婦枵腹露肘無怨言爲猶子婚娶成立終嫂三十餘年苦節鄉黨皆高其義子開基舉人

劉名翰

原長安人早喪父母其伯父母鞠育之

及長克本縣營伍伯母病思食肉因向天默禱剖

股爲羹以進伯母病隨愈縣令文公聞而異之以

花紅鼓樂迎送邑中其稱孝子云

王弘毅 行五祖居自堡村務農誓力絕人康熙
十三年王輔臣叛平涼五月申賊縱掠至白堡里
民皆竄走弘毅獨力敵被擒聞其勇投以偽劄並
碎之大罵不絕口遂受害甘泉寓裏得其辜而義
之爲合姚經歷殉節作小傳

韓璽聖 世居集義里起自行伍順治三年從征
逆孽王二等補湖廣鄖陽守備康熙十七年奉命
進剿竹房與賊戰谷山力竭被擒時吳逆方盛

衡州賊械以在逼降之不少屈罵賊而死後具聞
奉

旨贈署遊擊事詳見羅璇衮撰墓碣

流寓

秦程邈 下邳人爲獄掾獲罪始皇幽繫雲陽獄
凡十年從獄中作篆書奏之始皇大稱善出爲
作郎世以史籀所著爲大篆邈所作爲小篆以籀
文變爲隸體時方多戍役獄事煩興以應請徒隸
故曰隸

魏恭襄涇陽志云魏繫此十年所造
書傳於後世余不敢泯也今亦錄之

漢黃霸

字次公

淮陽陽夏人以豪傑役使徙雲陵

爲左馮翊察廉補河東均輸長復察爲河內太守
時武帝以刑罰痛繩群下俗吏競尙嚴酷霸獨用
寬和爲治後任潁川太守遷京兆尹治行第一入
爲丞相今祀鄉賢

見舊志

隋趙元淑 博陸人寓居雲陽父世模高祖時伐

陳戰沒以元淑襲其父爵煬帝立漢王諒作亂從

楊素率師擊平之以功特授將軍尋爲司農鄉加

柱國 見舊志

列女

元劉氏 雲陽人吳君錫妻也君錫卒家貧氏艱

苦自給守節終身

見通志

明齊氏 邑貢生郭縉妻無子妾劉氏生子二慶

元慶春薛氏生子一慶東縉卒時慶元二歲慶春

慶東各一歲二妾俱他適氏年二十七以死自誓

撫三子如已出辛勤愛護俱得成立嘉靖中巡按

御史張珩以恩例給與帛米知縣陳爵表其門曰

孀節 見舊志

袁氏 邑庠生羅九淵妻生子一女三子方八月九淵卒氏年二十八家貧躬勤織紝以撫諸孤後二女皆擇良配子食廩於庠享年七十知縣喬祐表其門族人延繡志其墓 見舊志

郭氏 適邑庠生羅天祐生子甫八月天祐病歿時氏年二十二欲縊以殉家人苦勸以養姑爲重乃止孀居三十餘年嘉靖中得旨旌表 見舊志

楊氏 邑民王彥學妻年三十彥學歿子永安八

歲永壽五歲躬紡績訓子備極勤瘁嘉靖癸卯永
壽領鄉薦人以氏爲善教年七十終

見舊志

文氏 三水縣人父禮部郎中諱在中性聰慧善

讀書適邑諸生葛大受年二十二大受卒子方禴

繼撫育成人父謨述觀宇觀宙天經天雅等書每

一稟成氏手爲編次教其子親加講究稱未亡四

十年不愧名家淑媛所著有君子堂集幽居草九

騷諸篇餘兵燹畧盡

見通志

王氏 處士羅廷官妻廷官早亡遺孤二皆在

抱茹齋食淡不改其節歲屢稜勤操作撫子經理
田畝以起家歷五十餘年享壽八十以上縣令楊
爓爲作苦節記比諸歲寒松柏異於梧竹以其歷
久不凋爲難云

羅氏 萊州知府諱奎女適三水舉人文毓鳳好
讀書善吟咏克盡婦道所著有拾翠閣草

見通志

鄧氏 嘉靖中貢生羅雲鳳妻雲鳳卒年未三十
苦志貞節撫其子國相成立爲上舍生縣令旌其
門曰共節孟教

呂氏 竹山縣尹羅大縉元配也未笄于歸能供
婦職奉其姑任恭人最得歡心恭人歿氏已病彊
起視含歛隨襄理窀穸謂竹山公曰吾方以不克
襄大事爲慮今大事畢雖死無憾矣無何病亟竹
山公叩以魂歸入夢氏歎曰魂魄升沉茫茫何之
死若有知何異於生君能來我於心我卽入君以
夢言訖而瞑臨終了非夙具慧根不能道

羅氏 西華縣尹諱胄女適三水庠生文翽鳳性
勤儉綜理中饋躬親井臼澣浣與夫力行表了凡

功過格夫病侍湯藥不櫛沐踰月及篤暗具纒矢
從死家人守之死而甦者三婺居四十年熊羆荻
畫教誨諸子年八十三終子倬天進士 見三水志

姚氏 適羅克明卽前所錄天祐子八月遺孤也
年三十二亦寡居痛姑郭爲翁守節嚙指自誓孝
養孀姑艱辛撫子割所居地以廣學宮士林交稱
之享年八十有三

羅氏 名鴈珠

邑庠生諱補袞女適涇陽庠生郭來

輔婚未匝月延安寇突起掠涇陽衆婦女同避匿

海傳異志 卷之六
高樓賊聞新婦殊麗索之急因縱火氏曰頭可斷
身不可辱從容登絕頂墜火中死時崇禎二年正
月上元日年十八群賊義之環拜而去來輔隱其
志終身不再娶邑人表於涇干曰女中丈夫

國朝葛氏女

乳名經姐

街民葛崇修女也年十三當

明季癸未闖逆旣僭踞西安賊黨分徇各州縣淳
化隨隕女潛逃匿車箱坡崖窰賊掠及之托女出
女極力掙脫舉身投深崖下賊去後父母勸之食
女泣曰兒手被賊汙誓不偷生水漿不沾口五日

而死

此與五代史王凝妻李氏斷臂相類歐陽公稱五十餘年間僅得一人越六百八十餘年復有此女
年未及笄
尤爲奇烈

姚氏 堡興村姚永安女適陳其元生三女夫亡
年二十餘凡資產悉讓予夫異母弟茹荼飲冰甘
貧守志撫其女皆完配明末遭賊掠乘間援賊刀
自刎血湧仆地賊驚退越宿得甦全節終身年七十
以上含笑而逝

郭氏 邑人王平妻順治元年十月土寇王老虎

襲破縣平方隨衆守陲氏聞賊入城抱幼子甫一歲同投七十餘尺井中平歸竭力救起得不死旣而平被賊斫傷越二年卒氏鞠育諸孤家計蕭然賴其夫從弟興調恤依與度日苦節三十餘年年七十餘

羅氏

名竇芳

邑庠生諱襄衮女卽竹山縣尹孫女

適三原房大猷順治二年正月值兵噪爲亂避高樓上聞兵至從樓投下死年十八氏與補衮女鴈珠從姊妹母方婉夢奉天竇烈女偕鴈珠來因以

竇芳名鴈珠前死越十有七年同月日氏亦遭變
死若夢是踐其英靈再世如一轍云

按奉天竇氏二女唐永泰中爲賊剽掠相繼投崖
谷而死詔特旌之今姊妹雖先後隕而墜樓同志
百世以下
皆起敬也

葛氏 邑人葛嘉樂女年二十一守節其夫高某
歿子祥兆甫歲餘截髮以誓無二志奉寡姑居高
家山遭賊剽掠舉身投谷中爲賊搜獲復舉身從
巉峭高崖投下深數十丈賊以爲死矣置之去越
三日得其屍有微息及救稍甦卽泣問姑何在曰

澤州縣志 卷之六
幸無恙乃竭力奉養以終自是長齋五十餘年誦
經持佛號一夕虎窺牖氏誤爲耕牛以手捫之虎
恬然伏地而去近村龍神廟歲旱每致禱間弗應
免氏在禱卽大雨遠近爭傳其誠孝節烈能格異
類感神明如此年八十七卒祥兆念母艱厄奉佛
寫印諸經典以爲永慕復殫貲力鏟削崎嶇山徑
以便行來殆有得於內典持地之教

一門五烈 杜氏 田氏 田氏女 名優 淑明

淑儀 杜係邑庠生光前女適庠生羅章袞稱

未亡十餘年順治三年六月土寇攻破縣氏呼其
養女淑明淑儀曰我孀婦義不可見賊指旁一井
曰吾死所也遂投井死二女見之泣不忍獨生相
繼俱投井死章袞有猶子群聘早夭遺妻田氏所
生女優年十四與杜連墻居聞變慨然曰嫠與女
俱不可辱遂携其女投杜所死井俱死及變定五
屍出井上見者無不垂涕康熙三十二年知縣朱
廷鉉題其門曰一門五烈先是知縣趙賓合羅氏
鴈珠竇芳爲七烈傳其事跡頗詳惜二養女姓氏

竟俱失傳四十年四月知縣張如錦捐俸立祠與

葛氏十三歲女並祀題曰六烈

考羅氏家譜補衮長子群聘娶田氏次子群芳娶張氏今傳稱田爲群芳妻通志亦同疑俱有誤特

從譜校正

王氏 邑民羅養真母也夫某亡年二十三撫二

子守志不移二子相繼歿又撫二孫藐孤在抱歷

盡劬勞知縣張綸立坊以表曰節久彌貞月給倉

米二斗卒年九十一

薛氏 王氏 薛爲邑庠生羅維垣妻年二十四

維垣卒遺孤銘鑑方二齡家貧苦守教其子髫年
入泮不幸早夭婦王氏奉姑又同育二孤雲瀚雲
浩俱爲庠生今曾孫懋賢懋德皆食餼於庠五世
孫復有繼起者濟濟文學人以爲世節之報

三世五節 張氏 王氏 王氏 羅氏 王氏

張爲邑庠生賈思達妻年三十夫亡守節子獻
庭舉人康熙十三年選四川滄溪縣知縣值吳逆
兵變阻金堂病故妻王年二十九次子佑庭歿妻
王年二十五三子佐庭歿妻羅年三十二獻庭子

又謹歿妻王年二十三先後相繼守節較五烈雖
常變不同而艱貞如一聚於同室王明經熙還獻
庭妻之兄又誼妻之父也自西和致仕歸里特撰
傳一篇授余讀至閱數十年滄溪公母子靈櫬未
還尤爲歎歎云

淳化縣志卷之七

知縣事長洲張如錦重纂

博覽志

古蹟

陵墓

寺觀

祲祥

古之君子往往旁搜廣覽以補耳目所不及歲月
雖遷古蹟具在載於圖記可考而知也關中陵墓
不可枚舉遺塚獨立猶有望堯母而憑弔者佛宮
道院荒域寥寥聊以考證興廢若夫五行災祥之

濟州縣志 卷之七
驗庶徵休咎之由惟日食地震不雨無年如舊史
遵春秋例躔度莫窺推測多妄姑置弗論俟善言
天者加之意而已

古蹟

合宮

在縣北五十里甘泉山下黃帝以來祭天處地理志云黃

帝治萬國朝諸侯乃作合宮兼明庭布政於甘泉
圜丘史記黃帝郊雍上帝宿三月其後方接萬靈

明庭

甘泉宮

在縣北五十里甘泉山上因山爲名漢武帝建元中所

造週一十九里銅人二在門外其內有宮十二臺
十一壯麗與建章宮比百官皆有邸舍立宿衛更
置前殿有芝生殿房九莖夜有光作芝房歌帝每
以五月避暑八月乃還今其地尚餘甃瓦甃作流
水紋瓦頭篆未央長生四字

本朝知縣趙賓始置石刻於武帝廟中以識云

按鄜縣渭

南俱有甘泉宮鄜爲隋宮渭南爲秦宮名
同而地異此處漢甘泉通志所記甚詳

林光宮

在縣北
甘泉山

師古云秦林光宮二世所造從廣

各五里漢於其旁起甘泉宮

甘泉苑

在縣北
車盤嶺

秦昭王時宣太后殺義渠於甘泉

漢文帝三年烽火達甘泉皆此地三輔黃圖云武

帝置甘泉苑緣山谷行至雲陽三百八十里入右

扶風週五百四十里苑中宮殿臺閣百餘有仙人

石闕封巒鵠鵲等觀按漢上林苑在南甘泉苑在

北皆秦苑漢修廣之所包地甚廣其名則專主耳

長定宮 秦離宮三輔黃圖云林光宮中長定宮

漢宣帝許皇后成帝許皇后並居長定宮

秦時 卽黃帝明庭祭天處漢武帝時或議五帝

泰一之佐宜立泰一上親郊元陽五年幸雍五時
遂幸甘泉立泰一祠壇天子親郊見一壇三垓五
帝壇各以方環居其下四方地爲醊食群神列火
滿壇旁烹炊具乃立樂府李延年爲協律都尉作

十九章歌正月上辛用事甘泉園丘使童男女七
十八俱歌成帝初匡衡奏罷甘泉泰時及南郊日
大風壞甘泉竹宮折拔時中樹木十圍以上百餘

永始元年詔復之按武帝初立壇祀泰一晝夜有神光用太史談之說五時各祠

一帝泰時立三垓以臨五帝故宣元之世有事泰時尤勤

紫殿 三輔黃圖云武帝起紫殿雕文刻鏤黼黻以玉飾之西京雜記云武帝設雲帳雲幄雲幕於甘泉紫殿謂爲三雲殿成帝永始四年幸甘泉神光降於紫殿

竹宮 甘泉祠宮也以竹爲宮去時壇三里史記武帝幸甘泉圜丘昏祠至明嘗有神光如流星集祠壇天子自竹宮望拜百官肅然心動

諸侯邸 史記方士多言古帝王書都甘泉者武帝天漢四年春正月朔朝諸侯王於甘泉宮遂置

甘泉諸侯邸

通天臺 武帝元封二年公孫卿言仙人好樓居
於是作甘泉通天臺漢舊儀云臺高三十餘丈雲
雨悉在其下去長安三百里望見長安城上有承
露盤仙人掌擎王杯承雲表之露元鳳中臺自毀
榱桷皆化龍鳳隨風雨飛去西京賦云通天眇以
竦峙徑百常而莖擢上瓣華以交紛下刻峭其若
削今其遺址猶存高二十餘丈

按關中記左右通天臺則是雙臺對

峙通靈臺不在此列故西都賦又云抗仙掌以承露擢雙之金莖

壽宮 漢書武帝病瘡起幸甘泉置壽宮又置壽宮北宮張羽旗設供具以禮神君

迎風館 三輔黃圖云武帝作迎風館甘泉山後加露寒儲胥二館西廂起徬徨觀其餘高光洪厓師得弩陸四宮俱在甘泉苑內棠梨宮在甘泉苑垣外

延壽館 益壽館 史記武帝從公孫卿言於甘泉作延壽益壽二館

明光宮 在甘泉宮內武帝發燕趙美女三千人

充之此與長安明光宮亦同名異地

通靈臺 漢武內傳鈞弋夫人既殯香聞十餘里

帝哀悼疑其非常人乃起通靈臺於甘泉嘗有一

青鳥往來臺上至宣帝時止

雲陽宮在故雲陽縣秦離宮也開山圖云古雲陽先王

之墟中有神書鐵券王石為記秦以前作雲陽宮

漢書馮昭儀徙雲陽宮王褒有雲陽宮記按秦之宮殿漢

多襲之後乃加廣如林光長定宮皆是

漢陽宮在縣西事蹟無考

涼武地在縣北五十里以漢武帝避暑處故名

寶鼎 史記武帝獲寶鼎於汾陰迎至甘泉從上

行薦之至中山晏温有黃雲蓋焉

祭天金人在甘泉山下武帝得休屠王祭天金人祠之

甘泉又立徑路神祠祭休屠王越巫姑磔鄴祠三

所長安志休屠已降為渾邪王所殺武帝以其向

化并銅像尊之又列典祀名為徑路神今時佛像通體金色

即其遺法西域行之已久

西原石鼓 自秦以來稱石鼓原不知石鼓所自

始今在武帝廟中高六尺其形如鼓

石上文多剝落其可辨者

魏文帝太和六年艾經艾程邑士夫敬謁又政和六年尹天覺張光李法石彥政孫浩率胡臨宰王仲武簿張仲恭尉步子厚寄居劉直道緣仲秋檢躡屯田恭謁武帝廟時等字跡

龍尾墩 漢元封中大秦國貢花蹄牛色駁高六

尺尾環繞其身角端有肉蹄如蓮花善走多力武

帝令輦銅石起望仙宮牛跡在石上皆蓮花形陽

關外故有花牛津輦得異石長十丈高三丈立於

望仙宮名龍鑿石武帝末石自陷入地尾出土上

後人呼爲龍尾墩

漢瓦 形製古妙工極精緻雖殘缺漫漶破之如
新有得其瓦頭者皆古篆盤屈隱起其文有長樂
未央長生無極漢并天下萬壽無疆上林儲胥等
字樣又有作楚字者秦瓦也秦作六國宮室用其
國號以別之舊長安志所載如此今甘泉宮遺址
偶拾得不全片瓦以爲古玩然無字跡可辨

古雲陽縣城

在縣西北五十里

始皇二十七年徙五萬家

於雲陽漢武帝太始元年徙郡國吏民豪傑於雲
陽自武帝至元成屢賜雲陽吏民爵女子百戶牛

酒醪寡高年劑及後魏別置雲陽縣今按別置非

秦時故地而後人多指甘泉山前為古雲陽蓋漢

所置地也縣北有村亦名古城村通志並載涇陽縣

雲陵故城在縣北二十里昭帝後元二年追尊趙婕妤為

皇太后起雲陵置雲陵縣起園廟徙三輔富人於

雲陵賜錢田宅

永安故城在縣東四十里舊志稱姚萇宮在小杜村西北

有故城有唐貞元年碑載其地遺事魏孝明帝孝

昌三年蕭寶夤亂闕右毛遐洪賓立義柵捍賊孝

莊帝永安元年於此置北雍州後徙宜州仍於柵處置永安鎮今碑已廢

二王庄

在縣東三十里

傳志稱疑卽姚襄姚萇故址

毛原監

入治谷二十里中有地名毛原監

秦王殿

在縣北五十里

白堡箭幹山西有寒山仙跡迤東

魏王樓姚萇兄襄建上有御池泉卽古鳳遊鄉晉

泰安初苻堅將姚萇起兵北地自立爲秦王其殿

基尙存入耀州境下有本縣地

通志載耀州

梨園鎮

卽今縣治舊長安志稱在金龜鄉宋淳

化中割以立縣地雲陽宮誌云車箱坂下有梨園

漢武帝所築大一頃樹數百株青蔥繁密望之如

蓋後以名鎮唐時亦稱梨園店見壽峰寺殘碑又

稱寨李克用嘗駐師於此唐京城內有梨園名同
地異詳見羅廷續雜辨

老德村在縣東三十里舊傳之王庄北有清明廟久廢今

石級猶存旁有碑文多剝落祇辨有村名老德及

有虞氏西巡狩致仕程希賢撰字跡

佛圖塔在縣南門內浮圖七級係唐時建造明崇禎中

知縣趙之琴重修邑人羅大權記刻石甃其旁今

已漸圯

石佛堂

在縣東南三十里

接涇陽縣界

孟侯原

在縣東北四十五里

接耀州界

練軍場

在縣東北四十里

疑亦後秦遺址

李謀庄

在縣西二十里

事跡不可考

折衝三府

舊志有折衝府水衝府仲山府創置

基址俱未詳或云縣首里舊名南府疑卽以此

吏隱堂

宋宣和七年知縣張安祖建詳見碑記

縣堂自明初移置舊志碑在儀門外今甃南門內

浮圖上通志舊志皆載古蹟良吏遺愛傳述不忘
如此

栢臺總憲坊

在北街

爲巡撫四川都御史羅廷繡立

進士坊

在北街

爲山東萊州府知府羅奎立

司徒大夫坊

在南街

爲贈戶部福建司郎中王紀立

陵墓

上古少昊陵

少昊金天氏塋雲陽

見舊志

漢鈞弋夫人陵

在縣北十五里

夫人姓趙氏齊人少好清

淨病卧六年右手拳望氣者言東北有貴人武帝

使人推求得之召見姿色殊絕披其手得一玉鈎
手尋展立爲婕妤因名鈎弋夫人所居宮爲鈎弋
宮妊十四月生昭帝命其宮門曰堯母門及從幸
甘泉群臣皆弔帝意欲立少子一日帝譴責夫人
夫人脫簪珥叩頭帝命引送掖庭獄夫人還顧帝
曰趣行汝不得活遂賜死立昭帝爲太子帝問左
右外人云何左右對曰人言立其子何去其母帝
曰不見呂太后耶夫人死暴風揚塵屍香聞十餘
里塋雲陽百姓皆感悼昭帝立追尊皇太后發卒

二萬人築陵號雲陵自漢始元訖今一千七百六十餘年遺塚巍然俗呼大圪塔茂陵在草土中人多未辨也

明都御史羅公廷繡墓在縣北十五里見通志

知府羅公奎墓在縣北十五里見通志

本朝贈遊擊韓公璽聖墓在縣北三十里

漏澤園在北門外依長安縣志附錄

寺觀

壽峰寺在北門外唐大中五年創建明萬曆中僧

書法華經刻石立幢

本朝順治七年知縣趙賓修康熙三十八年知縣佟

世祿重修舊設僧會司久廢

準提庵

在縣治北

順治十三年邑人賈我琳創建

白衣觀音庵

在北門外

雲寂寺

在縣西南十里

廣延寺

在縣北四十里

栢林寺

在縣北五十里

金輪寺

在縣南三十里

寺已廢其殘毀佛像一鐘尙存

保真觀

在南門外

順治十二年知縣張邦佐重修舊設

道會司久廢

真武殿

在北門外

老君庵

在縣西二十里

稜祥

漢高帝元年十月五星聚於東井二年關中饑人

相食文帝四年四月丙辰晦日食在東井武

帝元狩元年十月祠五時獲一角獸以燎元鼎五

年丁丑晦日食在東井元封二年甘泉房中產芝

九莖 昭帝元鳳元年通天臺毀椽桷化龍鳳飛
去 成帝河平元年四月己亥晦日食不盡如鉤
在東井 平帝元始元年五月丁巳朔日食在東
井 世祖建武二年關中大饑金一斤易豆五升
和帝永光十五年甲子晦日食在東井 安帝
永初七年四月丙申晦日食在東井 順帝永建
五年五月己丑晦日食在東井 桓帝延熹元年
七月乙巳雲陽地震

晉惠帝元康七年七月秦旱饑米斛萬錢 成帝

咸和二年五月甲子朔日食在東井 穆帝永和
十一年二月蝗自華陰至隴山百草無遺 孝武
帝寧康七年五月邠州蝗苻堅遣捕之歲大熟
唐太宗貞觀十三年六月雲陽石自燃投草木則
焚十七年己卯朔日食在東井 高宗永徽五年

六月庚午朔日食在東井龍朔元年五月甲子晦
日食在東井總章二年六月戊申朔日食在東井
中宗景龍元年六月丁卯朔日食在東井 明
皇天寶十三載六月乙丑朔日食不盡如鉤在東

井秋關中大饑 代宗廣德元年秋野蚘蝻蟲害稼
德宗貞元元年春旱夏蝗西盡河隴群飛蔽天
饑殣枕道

五代晉高祖天福七年四月關西諸郡蝗大饑

宋太宗至道二年十月潼關西諸州地震 英宗

治平元年二月乙未夜蒼黑雲起西北長五丈貫

東井 高宗紹興十二年十二月陝西不雨五穀

焦枯涇渭竭

元世祖至元二十八年陝西地震 文宗至順二

年正月陝西大旱饑 順帝至元二年陝西暴風
旱至正十九年五月關中諸郡蝗

明太祖洪武二年陝西大旱饑 宣德三年陝西

大旱饑 成化二十一年關中連旱百姓流亡殆

盡 弘治十四年正月朔西安地震 嘉靖七年

五月陝西旱八年陝西蝗十三年五月寧邠慶陽

等州縣大水滄沒人畜無數三十四年十二月西

安鳳翔慶陽郡邑地震如雷壓死數十萬人三十

七年閏七月淳化雨雹 萬曆四十四年夏六月

大雨五六月涇陽口子鎮有羊化爲龍橫截峪水
推激大石如雷聲兩岸山俱動直抵雲陽漂沒七
十餘村四十八年大饑 崇禎七年秋全省蝗大
饑冬全省地震十三年四月甲申天鼓鳴五月至
七月每晨天紅如赭秋全陝大旱饑米騰貴至十
四年春絕糶米皮石麩俱盡道殣重積甲申年正
月朔黑雲蔽天

本朝順治四年夏六月西安蝗大饑十一年六月初
八日夜西安各郡地震自西北來聲如雷壞室廬

歷八畜 康熙元年六月大雨至七月凡六十日
全省皆然涇渭洛漲溢絕渡十日湮沒甚衆以上俱見
通志三十一、三十二年連旱菽麥俱枯本邑斗粟
六錢

淳化縣志卷之七 終



